

Na osnovu člana 63. stav (1) tačka d) Zakona o visokom obrazovanju (Prečišćeni tekst) („Službene novine Tuzlanskog kantona“, broj: 21/21) i člana 52. stav (1) tačka b) Statuta Univerziteta u Tuzli, broj: 03-730-1/17 od 03.02.2017. godine, broj: 03-593-1-1/20 od 30.01.2020. godine, broj: 03-6094-1/20 od 17.12.2020. godine i broj: 03-653-1-3/22 od 09.02.2022. godine, Senat Univerziteta u Tuzli na sjednici održanoj 06.04. 2022. godine, utvrdio je

PRAVILNIK
O TREĆEM CIKLUSU – DOKTORSKOM STUDIJU NA UNIVERZITETU U TUZLI
(Četvrti prečišćeni tekst)

I OPĆE ODREDBE

Član 1.

Pravilnikom o trećem ciklusu – doktorskom studiju na Univerzitetu u Tuzli (u daljem tekstu: Pravilnik), uređuje se organizacija i izvođenje doktorskog studija, upis na doktorski studij, način provođenja ispita i istraživačkog rada, postupak prijave, ocjene i odbrane doktorske disertacije, kao i druga pitanja od značaja za realizaciju studija za sticanje naučnog stepena doktora nauka/umjetnosti na Univerzitetu u Tuzli (u daljem tekstu: Univerzitet).

Član 2.

Doktorskim studijem smatra se svaki studijski program koji daje pravo na sticanje diplome akademske titule i naučnog stepena doktora nauka ili doktora umjetnosti za određenu oblast, u skladu sa Zakonom, ovim Pravilnikom i Pravilnikom o akademskim i stručnim zvanjima resornog Ministarstva.

II ORGANIZACIJA TREĆEG CIKLUSA STUDIJA

Član 3.

- (1) Doktorski studij organizuju fakulteti/Akademija samostalno, zajednički sa drugim fakultetima ili sa drugim visokoškolskim ustanovama, ili Univerzitet zajednički sa drugim visokoškolskim ustanovama (u daljem tekstu: Organizator studija).
- (2) Organizator studija organizuje i izvodi doktorski studij iz naučnih/umjetničkih oblasti za koje je Univerzitet akreditovan, te provodi postupak za sticanje akademske titule i naučnog zvanja doktora nauka/umjetnosti iz odgovarajuće oblasti.
- (3) Za organizaciju studija iz prethodnog stava, saglasnost daje Senat Univerziteta.

Član 4.

Naučno-nastavno/umjetničko-nastavno vijeće fakulteta/Akademije (u daljem tekstu: NNV/UNV Organizatora studija), pokreće inicijativu i utvrđuje prijedlog za organizovanje doktorskog studija kojeg organizuje fakultet/Akademija, a Senat za određeni zajednički studijski program kojeg organizuje Univerzitet uz prethodnu saglasnost svih NNV/UNV-a fakulteta/ADU koji žele da učestvuju u tom doktorskom studiju.

Organizator studija

Član 5.

- (1) NNV/UNV Organizatora studija imenuje Vijeće za doktorski studij kao svoje stalno tijelo (u daljem tekstu: Vijeće) za sve studijske programe.
- (2) Senat Univerziteta (u daljem tekstu: Senat) za zajednički doktorski studij sa drugim visokoškolskim ustanovama imenuje Vijeće za doktorski studij.

- (3) Vijeće za doktorski studij ima 5 (pet) ili 7 (sedam) članova, koje bira NNV/UNV Organizatora studija na period od 4 (četiri) godine, iz reda nastavnika na doktorskom studiju.
- (4) Poslove sekretara Vijeća obavlja sekretar fakulteta/Akademije.
- (5) Predsjedavajući Vijeća je voditelj dokorskog studija kojeg imenuje NNV/UNV Organizatora studija, na prijedlog većine članova Vijeća.
- (6) Vijeće studija rješava sva pitanja koja se odnose na organizaciju i tok studiranja, te predlaže odluke koje donosi Senat odnosno NNV/UNV Organizatora studija, a u vezi su sa studijem (komisije i sl.)
- (7) Vijeće studija počinje sa radom najkasnije 90 dana prije početka nastave.

Član 6.

- (1) Voditelj dokorskog studija iz prethodnog člana se imenuje na period od 4 (četiri) godine.
- (2) Voditelj dokorskog studija obavlja slijedeće poslove:
 - a) saziva i predsjedava sjednicama Vijeća dokorskog studija,
 - b) predlaže prodekanu za nastavu i studentska pitanja Plan realizacije nastave,
 - c) ostvaruje potrebnu/optimalnu saradnju sa Uredom za nastavu i studentska pitanja Univerziteta,
 - d) učestvuje u pripremi i realizaciji konkursa za upis kandidata na treći ciklus studija,
 - e) učestvuje u pripremi sjednica Naučno-nastavnog vijeća fakulteta,
 - f) učestvuje u realizaciji odluka Naučno-nastavnog vijeća Fakulteta i Senata koje se tiču nastavnog procesa trećeg ciklusa studija,
 - g) učestvuje u pripremi prijedloga odluka Naučno-nastavnog vijeća Fakulteta o pitanjima trećeg ciklusa studija o kojima konačnu odluku donosi Senat Univerziteta,
 - h) utvrđuje raspored nastave i ispitnih rokova za studente trećeg ciklusa studija,
 - i) prati studente trećeg ciklusa studija u realizaciji naučno-istraživačkog rada u pogledu objavljivanja naučnih radova,
 - j) učestvuje u pripremi Odluka za priznavanje ECTS bodova upisanim kandidatima koji su stekli naučni stepen magistra nauka,
 - k) predlaže dekanu visine školarine trećeg ciklusa studija,
 - l) obavlja i druge poslove iz djelokruga svog rada u skladu sa drugim opštim aktima Univerziteta po nalogu dekana.

Organizacija i izvođenje studija

Član 7.

- (1) Doktorski studij se organizuje i izvodi kao redovni, vanredni, studij učenjem na daljinu ili kombinovanjem ova tri načina studiranja.
- (2) Doktorski studij se sastoji iz:
 - a) Pohađanja nastave i praćenje vrednovanja rezultata kroz utvrđene provjere znanja;
 - b) Izboru naučne oblasti/naučnog polja/uže naučne oblasti/naučne discipline/umjetničke oblasti u okviru koje će se raditi doktorska disertacija i izbora mentora;
 - c) Prijave i prezentacije izabrane teme, pristupa i naučnog metoda doktorske disertacije/rada;
 - d) Naučno-istraživačkog/umjetničkog i praktičnog rada na izradi doktorske disertacije;
 - e) Javne odbrane doktorske disertacije;
 - f) Objavljivanja dijelova istraživanja u referentnim časopisima.

Član 8.

- (1) Doktorski studij izvodi se po studijskim godinama i semestrima. Studijski program dokorskog studija realizuje se kroz:
 - a) Nastavu;

- b) Naučnoistraživački radi umjetnički rad;
 - c) Izradu i odbranu doktorske disertacije.
- (2) Nastavni proces se izvodi kroz predavanja, seminare, konsultacije, te druge utvrđene oblike nastave.
- (3) Nastavnik na trećem ciklusu studija može biti redovni ili vanredni profesor, odnosno docent koji, kao autor ima najmanje jedan naučni rad iz oblasti na kojoj izvodi nastavu, objavljen u časopisu indeksiranom u međunarodnim naučnim bibliografskim bazama relevantnim prema ANUBiH (<https://www.anubih.ba/index.phs/bs/biblioteka/relevantne-baze-podataka>), osim studija umjetnosti.
- (4) Po ukazanoj potrebi, nastavnik u nastavi trećeg ciklusa studija može biti redovni/vanredni profesor, odnosno docent koji kao autor ima najmanje tri naučna rada iz oblasti na kojoj izvodi nastavu, objavljena u drugom/im relevantnom/im časopisu/ima.

Struktura studijskog programa

Član 9.

Studijski program dokorskog studija sadrži:

- a) opis studija;
- b) trajanje studija;
- c) akademski naziv i naučno zvanje koje se stiče završetkom studija;
- d) uslove upiša na studij;
- e) ishode učenja;
- f) listu obaveznih i izbornih predmeta sa okvirnim sadržajem, brojem časova nastave i brojem ECTS bodova svakog predmeta;
- g) listu drugih obaveza i/ili aktivnosti iz kojih student ostvaruje ECTS bodove;
- h) način realizacije nastave i način provjere znanja za svaki predmet;
- i) listu izbornih predmeta;
- j) uslove i način upisa obaveznih i izbornih predmeta i drugih aktivnosti, kao i način izmjene odabira izbornog predmeta;
- k) uslove za upis u naredni semestar odnosno narednu godinu studija pri čemu se uzima u obzir ukupan broj ostvarenih ECTS bodova studenata u skladu sa ZoVO TK i Statutom;
- l) način završetka studija;
- m) odredbe o tome da li i pod kojim uslovima studenti koji su prekinuli studij, odnosno izgubili status studenta mogu nastaviti studij;
- n) silabuse/nastavne programe svih nastavnih predmeta predviđenih studijskim programom.

Član 10.

Student je dužan izvršiti sve obaveze iz upisanog studijskog programa koje se vrednuju kroz pripadajuće ECTS bodove, u skladu sa studijskim programom.

Vrednovanje rezultata rada tokom studija kroz ECTS bodove

Član 11.

- (1) Obim dokorskog studija vrednuje se sa 180 ECTS bodova. Obim studijskog programa iznosi 60 ECTS bodova u jednoj studijskoj godini, odnosno 30 ECTS bodova u jednom semestru.
- (2) Svi oblici nastavnog procesa, u skladu sa studijskim programom i nastavnim planom i programom vrednuju se sa određenim brojem ECTS bodova.

(3) Studijskim programom mogu se utvrditi preduslovi za slušanje i polaganje pojedinih predmeta ili dugih oblika nastavnog procesa.

(4) Ocjenjivanje studenata vrši se neprekidnim praćenjem rada studenata i na osnovu ECTS bodova stečenih izvršavanjem predispositivnih obaveza, te polaganjem ispita, odnosno izvršavanjem i drugih obaveza utvrđenih studijskim programom.

Član 12.

(1) Student koji u toku studijske godine ne ostvari 60 ECTS bodova, može prenijeti u narednu godinu studija 10 ECTS bodova ili najviše dva nastavna predmeta/ekvivalent drugih obaveznih oblika nastavnog procesa, ukoliko su vrednovani i sa više od 10 ECTS bodova.

(2) Student koji ne ispunio uslov iz stava (1) ovog člana, u obnovljenoj godini studija izvršava preostale obaveze, bez obaveze ponovnog pohađanja nastave.

Član 13.

(1) Nastava doktorskog studija se organizuje u skladu sa programom doktorskog studija.

(2) Senat Univerziteta na početku akademske godine određuje datum početka nastave, vremenski plan realizacije nastave i ispita te period upisa i ovjere semestra.

Član 14.

(1) Doktorska dišertacija vrednuje se u rasponu od 60 do 90 ECTS bodova u skladu sa studijskim programom.

(2) Istraživački rad studenta vrednuje se u ECTS bodovima, što se bliže uređuje planom i programom studija.

Trajanje doktorskog studija

Član 15.

(1) Treći ciklus studija – Doktorski studij traje tri studijske godine, odnosno šest semestara i vrednuje se sa 180 ECTS bodova.

(2) Student trećeg ciklusa studija, u skladu sa organizacijom studija utvrđenom ovim Pravilnikom i upisanim studijskim programom u obavezi je okončati doktorski studij i odbraniti doktorski rad u roku od šest godina, računajući od početka akademske godine u kojoj je upisan na studij trećeg ciklusa na Univerzitetu.

(3) Izuzetno, rok iz stava (2) ovog člana, na zahtjev kandidata se može produžiti najduže za još dvije akademske godine, ako postoje opravdani razlozi za produženje, o čemu odluku donosi naučno-nastavno/umjetničko-nastavno vijeće fakulteta.

(4) Studentu trećeg ciklusa studija koji ne okonča doktorski studij i ne odbrani doktorski rad u rokovima utvrđenim stavovima (2) i (3) ovog člana, prestaje status studenta o čemu dekan fakulteta/Akademije donosi rješenje.

(5) Lice iz stava (4) ovog člana ima pravo podnijeti zahtjev za nastavak studija najkasnije do kraja naredne akademske godine i nastaviti započeti studij, uz obavezu plaćanja utvrđenog a neizmirenog iznosa školarine, te obavezu plaćanja dodatne participacije u troškovima studija, o čemu dekan donosi rješenje.

(6) Odluku o visini dodatne participacije na prijedlog Senata donosi Upravni odbor Univerziteta, uz prethodnu saglasnost Vlade Tuzlanskog kantona.

(7) Pravo na nastavak studija, u skladu sa stavom (5) ovog člana student može ostvarivati najduže u naredne tri akademske godine računajući od isteka akademske godine u kojoj je podnio zahtjev za

nastavak studija, s tim da zahtjev za nastavak studija podnosi za svaku narednu akademsku godinu i to najkasnije 30 dana prije isteka tekuće akademske godine.

III UPIS NA DOKTORSKI STUDIJ

Član 16.

- (1) Upis na doktorski studij vrši se na osnovu javnog konkursa koji raspisuje Senat na prijedlog NNV/UNV Organizatora studija.
- (2) Konkurs se objavljuje u jednom od dnevnih listova u Bosni i Hercegovini i na web stranici Univerziteta.
- (3) Konkurs za upis kandidata na doktorski studij obavezno sadrži podatke o:
 - a) studijskim programima na koji se vrši upis,
 - b) minimalnom i maksimalnu broju studenata za upis;
 - c) uvjetima koje mora ispunjavati kandidat;
 - d) spisak potrebne dokumentacije o ispunjavanju uvjeta za upis koja se prilaže uz prijavu;
 - e) rokove za upis;
 - f) iznos školarine.

Član 17.

- (1) Na konkurs se mogu prijaviti kandidati koji su stekli diplomu drugog ciklusa studija ili ekvivalenta (akadenskog zvanja magistra) iz odgovarajuće oblasti nauka/umjetnosti.
- (2) Kandidati koji konkurišu na studij iz umjetnosti moraju imati uspješnu umjetničku praksu, odnosno referentne radove, što bliže utvrđuje UNV-e Akademije.
- (3) Izuzetno od stava (1) ovog člana, na konkurs doktorskog studija iz oblasti biomedicinskih i zdravstvenih nauka mogu se prijaviti kandidati koji su stekli diplomu završenog integrisanog studija prvog i drugog ciklusa, odnosno dodiplomskog studija iz odgovarajuće oblasti nauka, sa ostvarenih najmanje 300 ECTS kredita, što se bliže utvrđuje studijskim programom doktorskog studija.

Član 18.

Kandidatima za upis koji su stekli naučno zvanje magistra prije uvođenja Bolonjskog sistema studiranja iz oblasti koje su relevantne za oblasti iz kojih se organizuje doktorski studij priznaje se odgovarajući broj ECTS bodova kao i umanjeni iznos školarine, u skladu sa posebnim opštim aktom Univerziteta.

Član 19.

Kandidat za upis dužan je podnijeti prijavu i priložiti dokumente predviđene konkursom. U slučaju da je broj prijavljenih kandidata veći od broja određenog u konkursu, izbor kandidata koji su stekli pravo za upis vrši se na osnovu rezultata postignutih tokom ranijeg studija, a što se bliže utvrđuje studijskim programom.

Član 20.

- (1) Postupak rangiranja provodi Komisija za upis studenata, koju imenuje Vijeće Organizatora studija iz reda nastavnika studija koji se organizuje.
- (2) Prijedlog rang liste dostavlja se NNV/UNV Organizatora studija na konačno usvajanje.
- (3) NNV/UNV Organizatora studija dužno je dostaviti konačan izvještaj o rezultatima upisa studenata Senatu Univerziteta.

Član 21.

- (1) Rang lista kandidata se objavljuje na oglasnoj ploči i web stranici Univerziteta i fakulteta/Akademije.
- (2) Kandidat koji smatra da postupak rangiranja nije pravilno proveden, ima pravo prigovora NNV/UNV Organizatora studija u roku od tri (3) dana od dana objavljivanja rang liste na oglasnoj ploči fakulteta/ADU i web stranici.
- (3) Konačna rang lista kandidata objavljuje se na oglasnoj ploči fakulteta/ADU u roku utvrđenim konkursom.

Član 22.

Kandidat je ostvario pravo na upis ukoliko se nalazi na konačnoj rang listi do broja koji je konkursom predviđen za upis.

Član 23.

Student zaključuje sa Univerzitetom ugovor o studiranju, kojim se bliže utvrđuju njihova međusobna prava i obaveze.

Član 24.

- (1) Strani državljanin i lice bez državljanstva ima pravo ravnopravnog pristupa za upis na doktorski studij pod jednakim uvjetima kao i državljanin Bosne i Hercegovine, uz prethodno akademsko priznavanje diplome o prethodno završenom odgovarajućem ciklusu studija.
- (2) Lice iz stava (1) ovog člana plaća školarinu u visini utvrđenoj Odlukom Vlade Tuzlanskog kantona.

Mobilnost

Član 25.

- (1) Student trećeg ciklusa studija Univerziteta može provesti najviše dva semestra na drugom univerzitetu, kroz međunarodne programe mobilnosti, na osnovu ugovora o studiranju radi pohađanja nastave ili istraživanja pri izradi doktorske disertacije.
- (2) Studentu Univerziteta za vrijeme trajanja mobilnosti u svrhu istraživanja na drugom univerzitetu može se odrediti komentor iz reda izabranih nastavnika tog univerziteta, pri čemu mu se valorizuju rezultati istraživanja.
- (3) Odredbe o uslovima, načinu priznavanja ostvarenih ECTS bodova u toku trajanja mobilnosti odlaznom/dolaznom studentu bliže će se urediti Pravilnikom o međunarodnoj mobilnosti Univerziteta.

IV PRIJAVA, OCJENA I ODBRANA DOKTORSKE DISERTACIJE

Postupak prijave, ocjene i odobravanja teme (projekta doktorskog istraživanja)

Član 26.

- (1) Postupak prijave doktorskog rada kandidat započinje izradom nacrtu istraživanja za disertaciju u II semestru, a tema doktorske disertacije (projekta) može se prijaviti tokom III semestra.
- (2) Kandidat pokreće postupak prihvatanja teme doktorske disertacije (projekta) podnošenjem prijave Vijeću doktorskog studija.
- (3) Prijava sadrži:
 - a) opšte podatke o kandidatu, biografiju i popis radova kandidata;
 - b) naslov predložene teme;
 - c) podatke o predloženom mentoru i njegovim kompetencijama, koje dostavlja potencijalni mentor;
 - d) obrazloženje teme i očekivani izvorni naučni doprinos predloženog istraživanja;

e) izjavu da nije prijavio doktorski rad sa istovjetnom ili sličnom temom na drugom fakultetu/ADU Univerziteta, odnosno na drugom univerzitetu.

Član 27.

(1) Vijeće studija imenuje komisiju od 3 ili 5 članova od kojih je većina iz oblasti iz koje je predložena tema. Jedan od članova komisije, u pravilu je sa drugog univerziteta. Komisija razmatra prihvatljivost prijedloga teme i određuje nastavnika (supervizora) koji je potencijalni mentor, koji će usmjeravati studenta kod pripreme projekta doktorske disertacije. Student je dužan da do početka V semestra izradi i pristupi odbrani projekta.

(2) Projekt se brani pred komisijom iz stava (1) ovog člana. Odbrana projekta je javna.

(3) Odbrana projekta se može organizovati i putem video konferencije ukoliko član(ovi) komisije sa drugog univerziteta ima(ju) prebivalište/boravište izvan Tuzlanskog kantona, a što komisija unosi u zapisnik sa odbrane projekta.

(4) Kandidat može pristupiti odbrani projekta putem video konferencije uz prethodnu saglasnost Vijeća za doktorski studij.

Član 28.

(1) Komisija sačinjava izvještaj o odbrani projekta i dostavlja ga Vijeću dokorskog studija.

(2) Na osnovu pozitivnog izvještaja komisije i Odluke Vijeća dokorskog studija, student može prijaviti temu doktorske disertacije.

Prijava teme doktorske disertacije

Član 29.

(1) Prijava teme doktorske disertacije podnosi se NNV/UNV fakulteta/Akademije. Prijava sadrži:

a) biografiju doktoranta;

b) radni naslov doktorske disertacije;

c) uži istraživački domen;

d) metodološki pristup;

e) ciljeve;

f) detaljan pregled stanja u oblasti istraživanja u kojoj je tema definisana i očekivane naučne rezultate odnosno umjetnički doprinos.

(2) Uz prijavu teme kandidat prilaže i dokaz da ima najmanje jedan naučni rad objavljen u Univerzitetskom registru domaćih publikacija ili u časopisu indeksiranom u međunarodnim bibliografskim bazama koje su date u Relevantnim indeksnim bazama podataka ANUBiH (<https://anubih.ba/index.php/bs/biblioteka/relevantne-baze-podataka>), osim studija umjetnosti.

Član 30.

(1) Doktorska disertacija iz oblasti umjetnosti sastoji se od:

a) umjetničkog djela ili izvedbe kod izvođačke umjetnosti (u daljem tekstu: umjetnički projekt);

b) pismenog teorijskog rada kojim se elaborira proces nastanka, pretpostavljenih ciljeva;

c) rezultata umjetničkog projekta.

(2) Umjetnički projekt mora biti visokog kvaliteta i ostvaren adekvatnim umjetničkim postupcima i sredstvima kojima se dokazuje uspješno vladanje umjetničkim tehnikama i mora biti vrijedno javnog izvođenja, izlaganja ili objavljivanja.

(3) Pismeni rad/teza mora potvrditi doktorantovu sposobnost korištenja i razumijevanja odgovorajućih istraživačkih metoda i mora dati tumačenje dokorskog projekta u teorijskom i kritičkom kontekstu.

Član 31.

- (1) Na osnovu podnesene prijave NNV/UNV Organizatora studija predlaže Senatu Univerziteta sastav komisije za ocjenu podobnosti teme doktorske disertacije i kandidata.
- (2) Senat Univerziteta imenuje komisiju.
- (3) Komisija iz stava (1) ovog člana ima 3 ili 5 članova, nastavnika koji imaju naučni stepen doktora nauka od kojih je većina iz naučne/umjetničke oblasti iz koje se prijavljuje tema.
- (4) Jedan od članova komisije, u pravilu je sa drugog univerziteta.
- (5) Jedan od predloženih članova komisije je i potencijalni mentor.

Mentor

Član 32.

- (1) Mentor se određuje iz reda vanrednih i redovnih profesora, članova akademije nauka, te osoba u zvanju profesor emeritus iz uže naučne/umjetničke oblasti doktorske disertacije.
- (2) Mentor na trećem ciklusu studija kao autor mora imati najmanje jedan naučni rad iz oblasti iz koje je mentor, objavljen u časopisima indeksiranim u međunarodnim naučnim bibliografskim bazama relevantnim prema ANUBiH (<https://anubih.ba/index.php/bs/biblioteka/relevantne-baze-podataka>), osim studija umjetnosti.
- (3) Za doktorsku disertaciju iz oblasti umjetnosti biraju se dva mentora: mentor za umjetnički projekat i mentor za doktorski rad kao dio doktorske disertacije.
- (4) Mentor na umjetničkom projektu je nastavnik u umjetničko-nastavnom zvanju redovnog profesora, a mentor za pisani dio rada je nastavnik u naučno-nastavnom zvanju vanrednog ili redovnog profesora.
- (5) Po ukazanoj potrebi mentor može biti redovni/vanredni profesor koji kao autor ima najmanje tri naučna rada iz oblasti na kojoj je mentor, objavljena u drugim relevantnim časopisima koji se nalaze u Registru domaćih publikacija ili u ostalim bazama prema ANUBiH (<https://anubih.ba/index.php/bs/biblioteka/relevantne-baze-podataka>). Mentor za izradu doktorske disertacije dužan je da pomaže studentu pri izboru metoda naučno-istraživačkog/umjetničko-istraživačkog rada, literature, pripremi strukture rada, kao i da mu pruža drugu stručnu pomoć.
- (6) Mentor koji je preuzeo mentorstvo prije odlaska u penziju, ima pravo dovesti to mentorstvo do kraja.

Član 33.

- (1) Komisija za ocjenu podobnosti teme i kandidata doktorske disertacije podnosi NNV/UNV Organizatora studija izvještaj o podobnosti teme i kandidata.
- (2) Komisija iz stava (1) ovog člana podnosi NNV/UNV Organizatora studija izvještaj u roku koji ne može biti duži od 90 dana od dana prijema odluke Senata o imenovanju Komisije, s tim da se u ovaj rok ne uračunava period korištenja kolektivnog godišnjeg odmora na Univerzitetu u Tuzli.
- (3) NNV/UNV Organizatora studija utvrđuje prijedlog za usvajanje izvještaja i predlaže mentora.
- (4) Na osnovu prijedloga NNV/UNV Organizatora studija, Senat usvaja izvještaj o podobnosti teme i kandidata doktorske disertacije. Nakon usvajanja izvještaja, NNV/UNV Organizatora studija, uz prethodnu saglasnost Senata imenuje mentora za izradu doktorske disertacije.

Postupak ocjene doktorske disertacije

Član 34.

- (1) Doktorant je dužan dostaviti radnu verziju neuvezane doktorske disertacije u četiri primjerka sekretaru Vijeća.

(2) Uz disertaciju doktorant prilaže saglasnost mentora da se rad stavi u proceduru ocjene, kao i dokaz da je objavio ili da mu je prihvaćen najmanje jedan naučni rad iz teme doktorske disertacije kao uslov da može pristupiti odbrani doktorske disertacije.

(3) Relevantnim radom u smislu stava (2) ovog člana smatra se rad objavljen u časopisima indeksiranim u međunarodnim bibliografskim bazama, koje su date u Relevantnim i ostalim indeksnim bazama podataka ANUBiH (<https://anubih.ba/index.php/bs/biblioteka/relevantne-baze-podataka>).

(4) Studijskim programom trećeg ciklusa studija može se definisati Lista baza iz stava (3) ovog člana.

(5) Ukoliko je doktorska disertacija iz oblasti umjetnosti sačinjena u formi notnog, tonskog, video ili digitalnog zapisa, ista se dostavlja u formi u kojoj je sačinjena, u četiri primjerka.

Član 35.

NNV/UNV Organizatora studija utvrđuje prijedlog komisije za ocjenu doktorske disertacije od 3 ili 5 članova od kojih je većina iz oblasti doktorske disertacije. Jedan od članova komisije, u pravilu je sa drugog univerziteta. Senat Univerziteta imenuje komisiju za ocjenu doktorske disertacije.

Član 36.

(1) Komisija za ocjenu doktorske disertacije, nakon što rad pregleda, podnosi NNV/UNV organizatora studija pismeni izvještaj u roku koji ne može biti duži od 90 dana od dana prijema odluke Senata o imenovanju Komisije, s tim da se u ovaj rok ne uračunava period korištenja kolektivnog godišnjeg odora na Univerzitetu u Tuzli. Komisija za ocjenu doktorske disertacije obavezna je u izvještaju navesti da je kandidat u toku dokorskog studija, iz teme doktorske disertacije, objavio ili da mu je prihvaćen najmanje jedan naučni rad u publikaciji utvrđenoj stavom (3) člana 34. ovog Pravilnika.

(2) U Izvještaju komisija će predložiti da se doktorska disertacija prihvati, odbije ili vrati na dopunu, odnosno izmjenju.

(3) Ukoliko se doktorska disertacija vrati na dopunu, odnosno izmjenju, doktorant je dužan postupiti po odluci NNV/UNV Organizatora studija u roku od šest mjeseci od dana prijema odluke.

Član 37.

(1) U slučaju da NNV/UNV Organizatora studija vrati doktorsku disertaciju na dopunu, odnosno izmjenju, a doktorant u roku od šest mjeseci od dana prijema obavještenja o takvoj odluci ne postupi po primjedbama i sugestijama i ne dostavi dopunjenu doktorsku disertaciju, NNV/UNV Organizatora studija donosi odluku da je kandidat odustao od studija.

(2) U slučaju da NNV/UNV Organizatora studija odbije doktorsku disertaciju, kandidat gubi status studenta dokorskog studija, a prijavljena tema se registrira kao odbijena. Odbijenu temu doktorske disertacije kandidat ne može ponovo prijaviti.

Postupak odbrane doktorske disertacije/rada

Član 38.

(1) Nakon prihvatanja Izvještaja komisije o ocjeni doktorske disertacije, Senat Univerziteta donosi odluku o imenovanju komisije za odbranu doktorske disertacije.

(2) Jedan od članova komisije, u pravilu je sa drugog univerziteta.

(3) Senat Univerziteta utvrđuje mjesto, dan i sat odbrane doktorske disertacije.

(4) Javna odbrana se organizuje u roku koji ne može biti kraći od 30 dana od dana imenovanja komisije.

(5) Odbrana doktorske disertacije se može organizovati i putem video konferencije ukoliko član(ovi) komisije sa drugog univerziteta ima(ju) prebivalište/boravište izvan Tuzlanskog kantona, a što komisija unosi u zapisnik sa odbrane disertacije.

(6) Komisija iz stava (1) ovog člana ima 3 ili 5 članova, od kojih je većina članova komisije koja je ocijenila doktorsku disertaciju i iz naučne/umjetničke oblasti iz koje se brani doktorska disertacija.

(7) O javnoj odbrani doktorske disertacije, Sekretarijat Univerziteta objavljuje javnost preko svoje oglasne table, oglasne table Fakulteta/Akademije i web stranice Univerziteta.

(8) Obavještenje o javnoj odbrani sadrži:

- a) ime i prezime doktoranta;
- b) naziv doktorske disertacije;
- c) mjesto i vrijeme odbrane disertacije;
- d) sažetak doktorske disertacije.

Član 39.

(1) Javna odbrana doktorske disertacije pred komisijom ima sljedeći tok: Predsjednik komisije iznosi podatke i informacije o doktorantu, podatke o njegovim naučnim i stručnim radovima kao i podatke o ispunjavanju uvjeta za odbranu doktorske disertacije.

(2) Mentor daje kratki prikaz rada i čita izvod iz izvještaja komisije za ocjenu doktorske disertacije na osnovu čega je Senat prihvatio doktorsku disertaciju.

(3) Doktorant iznosi kraći rezime, rezultate i zaključke do kojih je došao, a nakon čega članovi komisije postavljaju pitanja.

(4) Javnoj odbrani iz oblasti umjetnosti (izvođačka umjetnost) prethodi javno izvođenje umjetničkog djela.

(5) Komisija za odbranu doktorske disertacije, nakon provedenog postupka, donosi odluku da li je doktorant odbranio ili nije odbranio doktorsku disertaciju.

(6) Predsjednik komisije saopštava odluku i javno proglašava rezultate odbrane.

(7) O toku javne odbrane doktorske disertacije vodi se zapisnik koji potpisuju članovi komisije i zapisničar. Sastavni dio zapisnika su pitanja postavljena doktorantu tokom odbrane disertacije.

(8) Doktorska disertacija je javna i može se objaviti nakon odbrane.

Član 40.

(1) Nakon uspješne odbrane doktorske disertacije kandidat je dužan u roku od mjesec dana uvezati doktorski rad i predati ga u dovoljnom broju primjeraka, i to po jedan primjerak dokorskog rada za: Narodnu i univerzitetsku biblioteku u Tuzli, fakultetsku biblioteku, članove komisije, Sekretarijat Organizatora studija, odnosno Univerzitet za zajednički doktorski studij, te po jedan primjerak ostalim ustanovama shodno Zakonu o bibliotečkoj djelatnosti Tuzlanskog kantona.

(2) Prije korićenja disertacije, kandidatu se, u potrebnom broju primjeraka dostavlja odluka o odbrani disertacije. Odluka se u pravilu uvezuje ispred sadržaja.

(3) Kandidat je dužan, istovremeno, prilikom predaje uvezanih radova dostaviti Uredu za NIR elektronsku verziju doktorske disertacije putem elektronske pošte na e-adresu: ured.disertacije@untz.ba i putem protokola na odgovarajućem mediju (CD, memory stick).

(4) Ukoliko je doktorska disertacija iz oblasti umjetnosti sačinjena u formi notnog, tonskog, video ili digitalnog zapisa, ista se dostavlja u formi u kojoj je sačinjena, u dovoljnom broju primjeraka, u skladu sa stavom (1) ovog člana.

V DIPLOMA

Član 41.

(1) Diplomom doktora nauka/umjetnosti stiče student koji je položio sve ispite utvrđene nastavnim programom doktorskog studija i odbranio doktorsku disertaciju na način propisan Statutom Univerziteta i ovim Pravilnikom.

(2) Uz diplomu se izdaje i dodatak diplomi koji sadrži detaljan uvid u nivo, prirodu, sadržaj, sistem i pravila studiranja i postignute rezultate tokom studija.

VI PRELAZNE I ZAVRŠNE ODREDBE

Član 42.

(1) Student trećeg ciklusa studija upisan na studij akademske 2013/2014. godine kojem je rješenjem dekana prestao status studenta sa istekom akademske 2020/2021. godine, može podnijeti zahtjev za nastavak studija do kraja akademske 2021/2022. godine uz obavezu plaćanja dodatne upisnine i/ili neizmirenog iznosa školarine, o čemu dekan fakulteta donosi rješenje.

(2) Zahtjev za nastavak studija student podnosi za svaku akademsku godinu, do okončanja istog, s tim da je krajnji rok za završetak studija do kraja akademske 2024/25 godine.

Član 43.

Četvrti prečišćeni tekst Pravilnika obuhvata:

1. Pravilnik o trećem ciklusu – doktorskog studija na Univerzitetu u Tuzli broj: 03-2351-1-5/20 od 29.05.2020. godine (Prečišćeni tekst),

2. Pravilnik o izmjenama i dopunama Pravilnika o trećem ciklusu – doktorskog studija na Univerzitetu u Tuzli (Prečišćeni tekst) broj: 03-2443-1-6/20 od 05.06.2020. godine,

3. Pravilnik o dopuni Pravilnika o trećem ciklusu – doktorskog studija na Univerzitetu u Tuzli (Prečišćeni tekst) broj: 03-4395-1-5.1/20 od 30.09.2020. godine,

4. Pravilnik o izmjeni Pravilnika o trećem ciklusu – doktorskog studija na Univerzitetu u Tuzli (Prečišćeni tekst) broj: 03-3430-1-6/21 od 16.07.2021. godine,

5. Pravilnik o izmjeni Pravilnika o trećem ciklusu – doktorskog studija na Univerzitetu u Tuzli (Prečišćeni tekst) broj: 03-4923-1-1/21 od 22.09.2021. godine,

6. Pravilnik o dopunama Pravilnika o trećem ciklusu – doktorskog studija na Univerzitetu u Tuzli (Prečišćeni tekst) broj: 03-5470-1-2/21 od 14.10.2021. godine,

7. Pravilnik o izmjenama i dopunama Pravilnika o trećem ciklusu – doktorskog studija na Univerzitetu u Tuzli (Prečišćeni tekst) broj: 03-653-1-5/22 od 09.02.2022. godine.

Član 44.

Prečišćeni tekst ovog Pravilnika primjenjuje se od dana njegovog donošenja, a važnost njegovih odredaba utvrđena je u Pravilnicima koji su obuhvaćeni prečišćenim tekstom Pravilnika.

UNIVERZITET U TUZLI

SENAT

Broj: 03-1925-1-3/22

Tuzla, 06.04.2022. godine



PREDSJEDAVAJUĆI SENATA

Nermine Hadžigrahić
dr. sci. Nermine Hadžigrahić, red. prof.